

PALAPES Bentuk Modal Insan Mahasiswa

Unit Komunikasi Korporat

Telah Dihantar: 13 Julai 2011 14:04

Kepada: UUM - All Staff; UUM All Students

13 JULAI 2011/11 SYAABAN 1432H

=====

"UUM : UNIVERSITI PENGURUSAN TERKEMUKA"
(THE EMINENT MANAGEMENT UNIVERSITY)

Oleh: Muhammad Mustakim Ramli

Gambar oleh: Zamarizul Salleh

PALAPES BENTUK MODAL INSAN MAHASISWA

UUM ONLINE: Latihan ketenteraan yang mencabar fizikal dan mental dalam Pasukan Latihan Pegawai Simpanan (PALAPES) dapat membentuk modal insan yang cemerlang dalam diri kalangan mahasiswa di samping sebagai panduan dalam menghadapi kehidupan yang kian mencabar.

Menurut Naib Canselor Universiti Utara Malaysia (UUM), Prof Datuk Dr Mohamed Mustafa Ishak, latihan ketenteraan yang mencabar menjadikan mahasiswa lebih berani, cekal, tabah, berdisiplin dan mempunyai keyakinan yang tinggi.

Katanya, kecemerlangan dan kejayaan mahasiswa bukan bergantung kepada keupayaan akademik semata-mata, tetapi berkait rapat dengan faktor-faktor lain.

"Tahap disiplin yang tinggi, pembentukan sahsiah diri yang terpuji, mempunyai nilai-nilai murni yang tinggi, mempunyai keterampilan diri yang unggul dan sikap kepemimpinan yang mampan, merupakan ciri-ciri yang perlu ada pada graduan yang bukan sahaja berkualiti, bahkan mampu menjadi aset yang tidak ternilai kepada negara," tambahnya yang juga Komandan PALAPES UUM.

Dr Mohamed Mustafa juga berkata, ini merupakan usaha yang telah dan sedang dilakukan secara berterusan oleh pengurusan universiti dalam melahirkan modal insan yang lengkap keilmuannya dan pada masa yang sama berkebolehan serta dinamik dalam memenuhi visi dan misi negara.

"Mahasiswa yang mempunyai kemahiran insaniah sudah semestinya menjadi nilai tambah pada mereka menjelang langkah ke alam pekerjaan yang mementingkan berkebolehan komunikasi, kemahiran menyelesaikan masalah, berkeyakinan tinggi dan perhubungan awam yang baik," katanya sewaktu berucap pada Majlis Makan Malam Rejimental Pertauliah PALAPES UUM 2011 di Hotel Katrina, Batu Pahat, baru-baru ini.